



**TERTIB ACARA  
KEBAKTIAN PARTONGGOAN RUMAH TANGGA  
GKPS PADANG BULAN, MEDAN**



**Suhut :** SEKTOR 6 (Makedonia)

**Parambilar :** Pdt. S.A. Girsang. **Paragenda/Doding :** St. Alven D. Saragih.

**Singer:** Sy. Moris, Bp.Jhan Harapan Purba, Bp.Abdi Salomo Munthe,

**Galangan:** Sy. Mahaitin Sinagan. **Tonggo Syfaat:** Sy.Jhonsari Haloho,

**Musik :** Bp. Thomas Saragih.

**Panorang :** Jumat, 22 Mei 2020, Pukul 19.30 WIB

*Persiapan : (Siparugas, Sitonggohonon, Sisahapkonon)  
(Kuria ibagas sikap "Saat Teduh")*

**1. VOTUM – INTROITUS – TONGGO :**

**Paragenda:** Ibagas Goran ni Naibata Bapa, pakon Tuhan Jesus Kristus  
ampa Tonduy Na Pansing, Sitompa langit pakon tanoh  
on. Amen.

Ale Naibata, Ham do Naibatanku na hupindahi, horahan  
do Tonduyhu Bamu, siholan do dagingku Bamu songon  
tanoh na dorging anjaha na horah, na so marbah. (Psalm  
63: 4-5). Haleluya.

**Martonggo ma hita :**

Ham Tuhan Naibata Bapanami na i nagori atas, puji-pujian  
ampa tarima kasih do sombahkononnami hu Bamu, halani  
holong ampa idop ni uhur-Mu boi hanami mangadongkon  
partonggoan ijon sadari on. Sai roh ma Ham marhasadaon  
pakon hanami. Ai hata-Mu do rigapan bani goluhnami on.  
Sai parsahapkon Ham ma hanami marsada-sada, ase  
ihagoluhkon hanami tongtong haluahon na hun Bamu.  
Amen.

**2. DODING : Hal. 402 : 1 – 2 “PUJI MA NAIBATANTA”**

1. *Puji ma Naibatanta, bai ianan Na Pansing-Nin,  
bai paratas hamuliaon-Nin.  
Haleluya! Haleluya! Puji ma Naibata.  
Pasangap ma goran-Ni, halani pambahenan-Nin,  
ampakon hagogohon-Nin.  
Haleluya! Haleluya! Pasangap Naibata.  
Pahata ma tarompit 'ge arbab pe,  
irandu pakon gonrang husapi pe.  
Irik homa sarunei 'ge sordam pe,  
sonai ampakon ogung marolol bei.  
Puji ma!Rumbuk ma baen parhata ni parugas in.  
Sombah ma!Marhiteihonni doding na lurlur ijin*

2. *Puji ma Naibatanta Sipargogoh na tarsulur in,  
parsimada harajaon in  
Haleluya! Haleluya!Puji ma Naibata  
Pasangap ma goran-Ni, ale ganup na marhosah in,  
ningon rup ma mamuji ijin.  
Haleluya! Haleluya! Pasangap Naibata.  
Pahata ma tarompit 'ge arbab pe,  
irandu pakon gonrang husapi pe.  
Irik homa sarunei 'ge sordam pe,  
sonai ampakon ogung marolol bei.  
Puji ma!Rumbuk ma baen parhata ni parugas in.  
Sombah ma!Marhiteihonni inggou na lurlur ijin.*

**3. SIBASAON : (Parmahan Na Madear)**

**4. DODING : Hal. 442 : 1 – 2 “BAI PARDALANAN NI GOLUHKU”**

1. *Bai pardalanan ni goluhku, ningon do Jesus i lambungku.  
Golap do tong hu idah ge siang ni ari,*

*anggo lang Jesus i lambungku manondangi.  
Ai hata-Mu Tuhan, panondang na totap,  
na manondangi uhur na golap.  
Megah mardalan au, hinsah tunggung jagar,  
ai Ham manogu au bai dalam na liar.  
Bai pardalanan ni goluhku, ningon do Jesus i lambungku.  
Golap do tong hu idah ge siang ni ari,  
anggo lang Jesus i lambungku manondangi.*

2. *Ge pe buei roh parmaraan, seng pala au be sai songgotan.*

*Lombang na bagas buntu-buntu hudalani,  
hubotoh Jesus do tongtong mangkasomani.  
Ai hata-Mu Tuhan, panondang na totap,  
na manondangi uhur na golap.  
Megah mardalan au, hinsah tunggung jagar,  
ai Ham manogu au bai dalam na liar.  
Ge pe buei roh parmaraan, seng pala au be sai songgotan.  
Lombang na bagas buntu-buntu hudalani,  
hubotoh Jesus do tongtong mangkasomani.*

**5. AMBILAN : Psalmen 27 : 7 – 14**

Mangihuthon ayat 1, Psalm on aima humbani si Daud. Lang ibotoh hita sadihari do on iluarhon Daud bani pardalanan ni goluhni. Hansa, anggo ibasa hita ayat 11 pakon 12 -sonai homa ayat 2 pakon 3 - boi isimpulhon hita : dong imbang atap munsuh sihabiaran bani Daud panorang ia. Mardingat pargoluhon ni Daud, sanggah garama pe dong do na patut sihabiaran sidompakhononni. Ingat hita ma sanggah mangimbang si Goliat ia. Sonai do age sanggah ipardakdak raja Saul ia piga-piga dokah.

Dob gabe raja pe ia, dong do bangsa-bangsa inggot harajaonni na gabe munsuhni. Tapi seng mahua ia, halani marhatengeran ia bani Naibata. Mangimbang jolma, munsuh atap lawan na kasatmata, na taridah ilobei ni

panonggor, monang do si Daud. Tapi dong do hape munsuh na mambahen talu si Daud, aima munsuh na lang boi idahon ni mata : sibolis. Ipakei sibolis panonggor ni si Daud, janah aha na niidahni ai mangkorhon na jahat ibagas uhurni, gabe maseda pertimbanganni, lupa ia bani hata ni Naibata. Jangin tumang do uhur na ipengaruhi sibolis ai : parbangkison, akal busuk das hubani pambunuhon. Aima kasusni pakon Batseba. Uhum pangkorhon ni ai pe jangin do : matei anak, iayak-ayak anakni ia, matei homa na mangayak-ayak ai. Munsuh atap imbang na manaluhonsi aima munsuh na lang taridah bani mata. Namin lang munsuh na baru ai.

Ai ai do homa na manaluhon inangta ai, si Hawa! Ipakei ulog ai pinggolni na torang marpanangar ai, sonai matani na tangkas marpangidah. Halani seng tarrajaisi uhurni, porsayanan ia bani hata ni ulog ai marimbang bani hata ni Naibata, gabe ipangan buah ni hayu ai. Jangin janah fatal do pangkorhonni! Mabiari do hita bani munsuh na taridah, tapi ninngon mabiari janah waspada do homa hita bani imbang na lang taridah in, sibolis pangagou in. Patut ma ipasingat hita : *“Torang ma uhurnasiam anjaha puho ma nasiam, ai mawat-awat do imbangnasiam, sibolis in, songon singa na maraum, mangindahi sibondutonni.” (1 Petur 5:8)* Mandompakhon imbang atap munsuh na ijahanin pe, na taridah age naso taridah patut do hita dilo-dilo ibagas tenger ni uhur hubani Naibata, mangaraphon pangurupionNi. Dong silanganni tolu hal isi ni dilo-dilonta atap tonggonta bani Naibata marhitei ambilan on, ase boi monang hita mangimbang munsuh in.

1. Ase totap hita mangindahi bohi ni Naibata Jahowa, padohor diri huBani, siholan bani parsauran pakonSi. Naibata seng onggala lupa banta, halani Paridop ni uhur do la. Hita do na ra janah gati lupa bani Naibata. Pori pe pangahapta sipota songon na itadingkon Naibata hita atap iponophon bohiNi dompak hita, dingat hita ma, lang na lupa Naibata banta. Ia do na manghatahon : *“Mintor tarhalupahon puang-puang ma anakni na inuman, mintor lang ma holong uhurni bani anak tinubuhkonni? Porini pe tarhalupahonsi sidea, anggo Ahu seng tarhalupahon Ahu ho.” (Jesaya 49:15)* Anggo bapa pakon

inangta, sidea sidohoran banta, ra do lupa banta, bahkan itadingkon do hita bani panorangni. Tapi Tuhanta seng lanjar itadingkon hita.

2. Ase iporluhon hita pangajaran na humbani Naibata. Hata ni Tuhan in do na boi mangajari hita bani dalan sidalananta romban hubani harosuhNi. Bahen hadearonta do pangajaran na humbani hataNi in. Mamorluhon pangajaran na humbani hata ni Tuhan mararti do ai : padear parsoranta pakon Tuhan in sandiri, padear parsoranta pakon hasoman jolma ampa tinompa na legan. Ahap-ahaphon hita tongon, sonaha jengesni anggo serasi janah harmonis ganup parsoran in. Lang pitah na tongkin on hansa homa hadearon in, tapi marpanghorhon das hubani na manongtong ai. I tanoh on pe dapotan, bani na laho roh ai pe dihut parbagian!
3. Ase marpangajaman bani Naibata hita. Bani ayat 14 isobut “ parhanalom ma Jahowa...” Parlobei, boi do iarusi hita in songon parentah ni Naibata hubanta. Tapi lobih dear homa use anggo boi ma hita sandiri manghatahon in bani dirinta, ai anggo domma humbagas uhurta manghatahon in, tontu dalankononta ma in. Parhanalom artini : haporsayai, arapkon, ajamhon, andalkan.

Topik Mingguanta paingathon hita : Itangihon Tuhan do dilo-dilo ni halak na porsaya. Dilo hita ma la, pangindo hita ase ipargogohi hita mangindahi bohiNi, marlajar humbani hataNi janah mangajamhonSi bani goluhta. Bani situasi covid-19 sonari pindo hita ase iajari hita maruhur manjaga dirinta ampa hasomanta pakon mangihuthon aturan-aturan na adong bahen hadearonta sandiri pakon bahen hadearon ni hasoman. Dingat hita ma : “Dompok halak parpintor do mata ni Jahowa, anjaha pinggolNi dompok dilo-dilo ni sidea.”(Psalm 34:16) Amen

#### 6. DODING : Hal. No. 334 : 1 + 4 “ANGGO SAI HOLSOHAN HAM”

1. Anggo sai holsohan ham bai goluh on,  
Pala ham mandolei lang tuk gogohmu.

*Ingat pasu-pasu ni Tuhanta in, janah paruhurhon pambaenan-Ni in.*

*Ulang lupa bai layak-Ni in, ganup ari sai bilangi in.*

*Sai bilangi pambaenan-Ni in, in ma pasu-pasu ni Tuhanta in.*

4. ‘Ge bai parlajouan hasunsahan pe,

*Roh do Tuhan paluahkon hita bei.*

*Dingat ma ganup dear layak-Ni in,*

*Na mangkasomani ham bai goluhmin.*

*Ulang lupa bai layak-Ni in, ganup ari sai bilangi in.*

*Sai bilangi pambaenan-Ni in, in ma pasu-pasu ni Tuhanta in.*

#### 7. TONGGO SYAFAAT

#### 8. DODING : Hal. No. 380 : 1 + 3 “MARHASOMAN JESUS”

*(Irik mangondoshon galangan)*

1. Mahasoman Jesus, marhasoman Jesus, sai monang hita on.

*Marhasoman Jesus, marhasoman Jesus, talu sibolis in.*

*Marhasoman Tuhan Jesus, hita monang do tongtong.*

*Marhasoman Tuhan Jesus, sai monang hita on.*

3. Gok pe paruntolon, gok pe paruntolon, bani goluhta on.

*Mangajamkon Jesus, mangajamkon Jesus, monang do hita on.*

*Sai martonggo ulang holang, ase monang hita on.*

*Ase das ganupan hita hubani na sonang.*

#### 9. TONGGO GALANGAN – PANUTUP – PASU PASU

**Parambilan : Ondoskon hita ma galanganta hubani Naibata, martonggo ma hita:** *(Basaon ma sada tonggo galangan na bani halaman 119)*

**Riap ma hita martonggo marhitei tonggo na niajarhon ni Tuhan Jesus hubanta.**

**Parambilan : Ham Bapanami na i nagori atas. Sai napapansing ma**

**+ Kuria** *goran-Mu. Sai roh ma harajaon-Mu. Sai saud ma harosuhni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousa nami songon panasap nami bani dousa ni hasoman na mardousa dompak hanami. Ulang hanami bobai Ham hu parlajouan. Paluah Ham ma hanami hambani pangagou. Ai Ham do simada harajaon, pakon hagogohon, ampa hasangapon sadokah ni dokahni. Amen.*

**Parambilan: Jalo nasiam (hita) ma pasu pasu hambani Naibata:  
Idopni uhur-Ni Tuhanta Jesus Kristus, pakon holong ni atei ni Naibata Bapa, ampa parsoran ni Tonduy Na Pansing ma mangkasomani nasiam (hita) haganupan. Amen!**

**Kuria** : *(Mandodingkon) Amen...Amen...Amen...*

## **10. Parsahapan - Tugah-tugah**

---